

鳳臺縣志

第九册

160.61
344
第29



鳳臺縣志

第九册

风台县志卷之十五

艺文 三

先师孔子迴车庙解

陈 棐

鄢陵陈子给事諫垣以进言滴外稍迁知泽郡经太行天井关关有孔子庙号曰迴车石上辙迹深尺长数十武庙则倾敝朽漏弗堪后讲堂惟故址陈子至郡首葺广之完展壮丽矣客有问迴车之说者陈子曰孔圣之车未尝登太行也按史记世家孔子不得用於卫将西见赵简子至河而闻竇鸣犊舜华之死临河叹曰美哉水洋洋乎邱之

鳳臺縣志

卷之十五

艺文

一

不济此命也乃还息乎陬乡作陬操以哀之而返乎卫斯世家所谓至河者黄河也禹贡导河东过洛汭至於大伾北过泲水至於大陆括地志曰大伾山今黎阳东山索隐则曰大陆在鉅鹿及入我朝黎阳即北直隶濬县而鉅鹿之大陆泽则宁晋境也是古之黄河过洛汭即东北流而卫国在其东南故自卫之晋必过河而后太行过太行而后晋境孔子当时既临河而返是未济河也既未济河是未诣太行之下也其太行之巅有迴车之辙者妄矣客曰孔子无迴车太行矣何以有庙欤陈子曰余闻其说矣水

经魏邠道元注曰野王西北有故邠城当太行南路邠水又东南逕孔子庙东庙庭有碑魏太和元年孔灵度等以旧宇毁落上求修复野王令范众爱河中太守元真刺史咸阳公高允表闻立碑於庙且云按诸子书史籍之文並言仲尼临河而叹是非太行迴车之言也鲁国孔氏官於洛阳因居庙下以奉烝尝斯言至矣盖孔因迁山下追思圣祖故立庙存飨耳其犹刘累迁鲁立尧祠於山东矣水经之言明可考见如此夫邠道元后魏人也太和魏孝文年号也已云旧宇毁落是此庙元魏以前西汉三国时所

建然建之自孔氏始客曰诚若此何以汉魏水经即以迴辙称也陈子曰欲往晋而卒未往者孔子之实也适晋之路而当晋之境者太行也升太行之巔苍然远望而可指见者黄河济渡处也后人思孔圣者徘徊行山之巔望孔子临河旋轅之处庙曰迴车亦何不可况我孔圣道在天下功在生民自国都以迨乡塾皆宜祀之故先正曰自天子至於邦邑通祀遍天下惟社稷与孔子又曰仲尼之道与王化远迩盖春秋释奠於先师者诗书礼乐之师也孔子则人道之主也有君臣父子之所在即祀祠之所在也

廟於關鎮未為多矣客曰車轍石迹則何始乎陳子曰此不可遽以為信也斯不由於天成則出於人為耳古之人亦有精誠動金石者如射石而矢沒羽刺山而泉湧出者蓋其一時事際迫切義氣憤激動觸天地偶然事也即使孔子迴車於太行亦何所迫切憤激而志動於石乎況太行路逕數十里何獨此尋丈之轍迹乎地志沁水西孔山穴洞內石有車轍耆舊傳云此自然成者非人力所就也予謂此迹若非穴內車所不及之地則后亦必指為仙靈之迹孔廟之迹或類此不然則好事者因迴車之名而為

之也胡可據以為信耶客曰此地名天井關然俗亦名攔車者父老傳為孔子見黃鼠拱立或曰小兒拱揖因之迴車也今車迹曰妄矣父老傳異必盡誣陳子曰天井名關舊矣古地志曰高都縣有天井關蔡邕曰太行山上有天井關在井北遂因名焉故劉歆遂初賦曰馳太行之峻坂入天井之喬關史漢光武建元二年遣司空王梁北守天井關击赤眉別校是關亦兩漢三國前所設至於攔車之名果俗因迴車之妄附會之而狼車則又攔車流讹也今直名天井可矣攔車狼車之名直盡革削以絕謬傳於是

客盱衡而语曰鄙人五疑而公五释之迴车之义昭然矣
请以示夫人人因遂书为迴车庙解俾貽夫主祠祀者

适晋纪行

王世贞

余以庚午六月起於家过大江北道齐鲁历汴抵卫出修
武发宁郭驿三十里抵清化镇山西之冶器集焉渡清河
田禾益茂嘉树滃鬱居人引泉水为长沟以灌有水碓水
磨之属未饭万善驿四旁栽白杨萧萧悲风殊益人旅愴
乃知少府斋中之不易也自是始入太行亦不甚险恶昇
夫鱼贯而上久之以为绝顶矣乃复有山障之愈上愈不

穷至碗子城为豫并界两山相对数十百丈巨壑陡绝无
底中为岭道石梁如玉雪又复数岭回顾中原倘恍无尽
平楚鬱鬱纷吐苍翠日色与云气争长俄而雨潦数十里
中亘其平狂风骤发万窍怒号食顷雨亦随至诵唐人三
晋河山皆北向二陵风雨自东来语宛然若画为小憩民
居久之以迫暝强发上下塙坂泥滑马足凿落与人趾错
先后甚窘抵星轺驿初鼓尽矣是夕凉甚五鼓不成寐初
九日黎明冒雨发道有古祠刻石崖表曰孔子回车处按
赵杀鸣犊孔子临河而返此去河远盖附会语也泥泞益

甚未抵泽州饭太行驿道始平得一小舒暝抵乔村驿复
小雨夜凉如前夕黎明复冒雨发阅七日抵太原之任

相如贤於廉颇论

世称蔺相如以区区之赵抗虎狼之秦秦虽强暴不能陵
赵者相如之功也谓其贤於廉颇愚窃疑之何则秦之所
以不能陵赵者以其国治兵强也固非口舌之间所能抗
也然则国何以治兵何以强岂非廉颇在其位耶赵得和
氏璧秦王闻而欲之请易之以土田相如奉命衔璧而往
秦王欲强取之相如抗节不挠视死如归卒欺秦王而归

璧於赵以是为相如之功噫又何足称哉夫和氏之璧怀
握之玩得之不足以为重失之不足以为轻而相如以死
争之以诈取之有如秦王赫然增怒肆其强暴逞其毒螫
菹醢相如移兵攻赵是为赵王爱数寸之玉丧国士之贤
贪无用之器貽宗庙之忧人臣爱君果如是哉渑水之会
秦王请赵王鼓瑟而诏史书之相如进缶於秦王秦王不
可则挺剑却之必得当而止是何异竖小人矜豪恃
气不能相下者恶足言功哉昔桀为无道汤幽囚於夏台
戎狄侵豳大王避之於岐文王三分天下有其二就拘於

羸里夫以幽拘之辱弃国而逃与一鼓瑟之间孰难哉然而三王忍耻行之卒蹶夏商抚绥四海相如倘能相赵王示微弱以骄秦忍小耻以怒赵崇德修政以须秦之可亡从而什之济黔首於塗炭救赤子於虎狼其功烈岂不焯焕光远哉而於樽俎之间坛坫之上争言暴气取当而止英伟之士不亦可羞哉赵王不能远观嘉其一命之不辱赏其要劫之小策一旦位诸功臣之上廉颇日夜愤愤欲砺刃刺之而相如能不与之较此则贤矣然亦不可用一善掩大功世称藺优於廉非通论也

茹太素传

明史

茹太素泽州人洪武三年乡举上书称旨授监察御史六年擢四川按察使以平允称七年五月召为刑部侍郎上言自中书省内外百司听御史按察使检举而御史台未有定考宜令守院御史一体察核磨勘司官吏数少难以检覈天下钱粮请增置若干员各分为科在外省卫凡会议军民事各不相合致稽延请用按察司一员纠正帝皆从之明年坐累降刑部主事陈时务累万言太祖令中书郎王敏诵而听之中言才能之士数年来幸存者百无一

二今所任率迂儒俗吏言多忤触帝怒召太素面诘杖於朝次夕復於宮中令人誦之得其可行者四事慨然曰為君難為臣不易朕所以求直言欲其切於情事文詞太多便至焚听太素所陳五百餘言可盡耳因令中書定奏對式俾陳得失者無繁文摘太素疏中可行者下所司帝自序其首頒示中外十年與同官曾秉正先後同出為參政而太素往浙江尋以侍親賜還里十六年召為刑部試郎中居一月遷都察院僉都御史復降翰林院檢討十八年九月擢戶部尚書太素抗直不屈屢瀕於罪帝時宥之一日宴便殿賜之酒曰金杯同汝飲白刃不相饒太素叩首即續韻對曰丹誠圖報國不避聖心焦帝為惻然未几滴御史復坐排陷詹徽與同官十二人俱鐐足治事後竟坐法死

張曷傳

明史

張曷澤州人洪武中以人材累官工部右侍郎謝貴者不知所自起歷官河南衛指揮僉事建文初廷臣議削燕更置守臣乃以曷為北平布政使貴為都指揮使並受密命時燕王稱疾久不出二人知其必有變乃部署在城七卫

及屯田军士列九门防守将执王昺库吏李文直预知其谋密以告王王遂得为备建文元年七月六日朝廷遣人逮燕府官校王伪缚官校置廷中将付使者给昺贵入至端礼门为伏兵所执俱不屈死燕将张玉朱能等帅勇士攻九门克其八独西直门不下都指挥彭二跃马呼市中曰燕王反从我杀贼者赏集兵千馀人将攻燕府会燕健士从府中出格杀二兵遂散尽夺九门初昺被杀丧得还靖难后出昺尸焚之家人及近戚皆死葛诚不知所由进洪武末为燕府长史尝奉王命奏事京师帝召见问府中

事诚具以实对遣还王佯病盛暑拥炉坐呼寒甚昺贵等入问疾诚言王实无病将为变又密疏闻於帝及昺贵将图王诚与护卫指挥卢振约为内应事败诚振俱被杀夷其族又伴读余逢辰字彦章宣城人有学行王信任之以故得闻异谋乘间力谏知变将作贻书其子誓必死兵起复泣谏言君父两不可负死之北平人杜奇者才隽士也燕王起兵徵入府奇因极谏当守臣节王怒立斩之

杨砥传

明史

杨砥字大用泽州人洪武末由进士授行人司右司副上

疏言杨雄为莽大夫貽讥万世董仲舒天人三策及正谊明道之言足以扶翼世教今孔庙从祀有雄无仲舒非是帝从之历官湖广布政司参议建文中言帝尧之德始於亲九族今宜惇睦诸藩无自剪枝叶不报坐丧归成祖即位起鸿胪寺卿乞终制服阙擢礼部侍郎坐视河渠失职降工部主事改礼部永乐十年迁北京行太仆侍卿时吴桥至天津大水决堤伤稼砥请开德州东南黄河故道及土河以杀水势帝命工部侍郎藺芳经理之定牧马法请令民五丁养种马一匹十马立群头一人五十马立群长

鳳臺縣志

卷之十五

藝文

九

一人养马家岁蠲租粮之半而蓟州以东至山海诸卫土地宽广水草丰美其屯军人养种马一匹租亦免半帝命军租尽蠲之餘悉从其议於是马大蕃息砥刚介有守尤笃孝行十六年母丧哀毁未至家卒

侯璉传

明史

侯璉字廷玉泽州人少慷慨有志节登宣德二年进士授行人乌撒乌蒙土官以争地相讐杀诏遣璉及同官章聪谕解之正其疆理而还副侍郎章敞使交阯关门卑前驱偃而入璉叱曰此狗窦耳奈何辱天使交人为毁关乃入

及归餽遗无所受迁兵部主事正统初从尚书柴车等出铁门关御阿台有功进郎中从王骥征麓川至金齿骥自统大军击思任发而遣璉援大侯州贼众三万至督都指挥马让卢钺击走之遂由高黎贡山兼程夜行会大军压其巢麓川平拜礼部右侍郎参赞云南军务诏与杨宁二年更代骥再征麓川璉以功迁左九年代还母忧起复寻调兵部十一年复代宁镇云南思机发窜孟养骥复南征璉与都督张軌分兵进抵金沙江破之鬼哭山玺书褒賚景泰初贵州苗韦同烈叛围新添平越清平兴隆诸卫命

璉总督贵州军务讨之时副总兵田礼已解新添平越围璉遂遣兵攻败都卢水西诸贼贵州道始通又调云南兵由乌撒会师开毕节诸路檄普安士兵援安南卫而自率师攻紫塘弥勒等十馀寨会贼复围平越回师击退之遂分哨七盘坡羊肠河杨老堡解清平围东至重安江与骥兵会兴隆抵镇远道皆通捷闻进兵部尚书进克赏改苗禽其渠王阿同等三十四人别贼阿赵伪称赵王率众掠清平璉复讨禽之水西苗阿忽等六族皆自乞归化诏璉随方处置景泰元年八月以劳瘁卒於普定年五十三赐

祭葬廕其子锦衣卫世袭千户

张养蒙传

明史

张养蒙泰亨泽州人万历五年进士选庶吉士历吏科左给事中少负才名明习天下事居言职慷慨好建白以南北多水旱条上治奸民恤流民爱富民三事帝嘉纳之锦衣都指挥罗秀营僉书兵部尚书王遴格不行失欢权要而去秀竟蚤缘得之养蒙疏发其状事具遴传御史高维崧等言事被滴养蒙偕同官论救复特疏讼之忤旨夺俸寻迁工科都给事中都御史潘季驯奏报河工养蒙上

言曰二十年来河儿告患矣当其决随议塞当其淤随议濬事竣辄论功夫淤决则委之天灾而不任其咎濬塞则归之人事而其蒙其赏及报成未久惧有后虞急求谢事而继者复告患矣其故皆由不久任也夫官不久任其弊有三后先异时也人已异见也功罪难执也请倣边臣例增秩久任斯职守专而可责成功帝深然之有诏潞安进绸二千四百匹未几复命增五千养蒙率同官力争且曰从来传奉织造具题者内臣拟旨者阁臣抄发者科臣今径下部非祖制不从出为河南右参政寻召为太仆少卿

四迁左副都御史二十四年极谏时政阙失言迹来殿廷希御上下不交或疑外臣不可尽信或疑外事未可尽从君臣相猜政事积废致市猾得以揣意旨左右得以播威权惟利是闻祸将胡底谨以三轻二重之弊为陛下陈之一部院之体渐轻或虚其位而不补或用其人而不任如冬官一曹亚卿专署已为异事乃冢宰何官数月虚位法司议刘世延罪竟尔留中主事刘冠南疏入即发何小臣听而大臣不听单疏下而公疏不下哉以至户曹三疏谏开矿臣院九疏催行取皆置不报议大事则十疏而九不

行遇廷推则十人而九不用夫大臣师表百僚奈何轻之至此一科道之职渐轻五科道给事中久虚不补御史曹学程一系不释考选台谏屡请屡格乃至服阙补任亦皆废阁是不欲言路之充也夫政无缺失何惮人言徒使唯诺风成謇谤意绝国是将何定乎一抚按之任渐轻如开矿一事抚按有言咸蒙切责於是郑一麟以千户而妄劾李盛春夫閹人武弁得以制巡抚之命纪纲不倒置乎一挡得志诸挡效尤抚按敛手何有於监司从此陛下之赤子将无人拊循矣一进献之途渐重下僚捐俸儒士献资

名为助工实怀觊幸甚者百户王守仁以谋复世爵妄搆楚府而使陛下恩薄於懿亲主簿张以述以求复旧秩妄献白鹿而使陛下德捐於玩物部臣纠之不听言官纠之不听业已明示好恶大开受献之门将见媚子宵人投袂竞起今日献灵瑞明日贡珍奇究使败节文官僨军武帅凭藉钱神邀求故物不至如嘉靖末年之浊乱不止也一内差之势渐重中使纷然四出乞请之章无日不上批答之旨无言不温左右藉武弁以营差武弁藉左右以网利共搆狂言诬惑天听陛下方厌外臣沮挠谓欲办家事必

赖家奴於是有言无不立听岂武弁皆急君而朝绅尽误国乎今奸宄实繁有徒采矿不已必及采珠皇店不止渐及皇庄继而营市舶继而复镇守内可以谋坐营外可以谋监军正德敝风其鉴不远凡此三轻二重势每相因德与财不並立中与外不两胜惟陛下早见而速图之不报又明年六月两宫三殿继灾养蒙复上疏曰近日之灾前古未有自非君臣交儆痛革敝风恐虚文相漫大祸必至臣请陛下躬谒郊庙以谢严谴立御便殿以通物情早建国本以系人心停银矿皇店之役杜四海乱阶减宦官宫

妾之刑弭萧墙隐祸然此皆应天实事犹非应天实心也
罪己不如正己格事不如格心陛下平日成心有四一曰
好达朝享倦於躬临章奏倦於省览古帝王乾健不息似
不如此一曰好疑疑及近侍则左右莫必其生疑及外庭
则寮案不安於位究且谋以疑败奸以疑容古帝王至诚
馭物似不如此一曰好胜奋厉威严以震群工喜谄谀而
恶鯁直厌封驳而乐顺从古帝王予违汝弼似不如此一
曰好货以聚敛为奉公以投献为尽节古帝王四海为家
似不如此愿陛下戒此四者亟图更张庶天意可回国祚

可保帝亦不省寻迁户部右侍郎时再用师朝鲜命养蒙
督饷事宁予一子官三十年尚书陈藻称疾乞罢诏养蒙
署事会养蒙亦有疾在告固辞给事中夏子阳劾其托疾
遂罢归卒於家天启初溢殿敏

王允成传

明史

王允成字述文泽州人万历中举於乡除获鹿知县以治
行异等徵授南京御史时甲科势重乙科多卑下之允成
体貌魁梧才气颯发欲凌甲科出其上首疏论辽左失事
诸臣请正刑辟熹宗即位廷臣方争论挺击移官事而帝

降两谕罪选侍因言移宫后相安状大学士方从哲封还上谕允成陈保治十事中言张差闯宫说者谓疯癲青宫岂发疯之地庞保刘成岂并疯之人言念及此可为寒心今郑氏四十年之恩威犹在卵翼心腹实繁有徒陛下当思所以防之比者圣谕多从中出当则开汤皂之端不当而臣下争执必成反汗之势孰若事无大小尽归内阁至元辅方从哲屡劾不去陛下於选侍移宫后发一敕谕不过如常人表明心迹耳从哲辄封还夫封后之命都督之命贬滴周朝瑞之命何皆不封还司马昭之心路人知之

矣姚宗文阅视辽左与熊廷弼相失归而鼓同列攻之允成恶其奸再疏论列天启元年疏请恤先朝直臣列杨天民等三十六人以上帝纳之俄陈任辅弼择经略慎中枢专大帅更戎政严赏罚数事末言方今最可虑者陛下孤立禁中先朝怙权恃宠诸奄与今日左右近习互相忌嫉恐乘机肆毒彼此相戕夫防护禁庭责在内阁及司礼务令潜消默化俾圣躬与皇弟并得高枕无忧斯为根本至计时黷其言已劾刑部尚书黄克缙倡言保护选侍贻误贾继春又曲庇盗宝内侍至辨御史焦源溥纲常一疏刺

謬特甚已极论内降及留中之害未复规切阁部大臣忤旨停俸给事中毛士龙劾府丞邵辅忠允成亦偕同官李希孔斥辅忠已极言纲纪废弛请戒姑息破因循指斥时事甚悉当是时中贵刘朝魏进忠与乳媪客氏相倚为奸允成抗疏历数其罪略言内廷顾命之档犬食其馀不蒙帷盖之泽外廷顾命之老中旨趣出立见田里之收以小马为驰骋之资谁启盘於游田之渐以大臣为释忿之地谁启拂其耆长之心刘朝辈初亦不预外事自沈淮邵辅忠导之遂恣肆无忌浸假而王心一倪思辉朱钦相斥矣

浸假而司空用陪推矣浸假而中旨用考官矣是易置大臣之权在二竖也近者弄权愈甚逐大臣如振落王纪满朝荐並削职为编氓是驱除大臣之权在二竖也科臣迁改自有定叙给假推陞往例皆然乃恶周朝瑞之正直忽有不许推用之旨是转迁百官之权在二竖也秦藩以小宗继大宗诸子不得封郡王祖制昭然乃部科争之不获相继而去是进退诸藩之权在二竖也招权纳贿作福作威二竖弄权於外客氏主谋於中王振刘瑾之祸将复见今日疏入进忠辈切齿允成复特疏论秦府濫恩之謬帝

终不省三年六月允成又劾进忠进忠益恨明年赵南星为吏部知允成贤调之於北未几南星被逐御史张訥劾南星调允成非法遂除名后给事中陈维新复劾允成贪险诏抚按提问坐以贓私庄烈帝嗣位以允成尝请保护皇帝识其名召复故官未几卒当天启初东林方盛其主张联络者率在言路允成居南与北相应和时贵多畏其锋然愕愕敢言屡犯近倖其风采足重云

送晋城鍾方塘赴陝参政序

杨博 蒲州尚書

余与方塘子俱晋人也乙酉同举於乡己丑同举进士同

出为县令断金之谊合簪之雅盖不啻乡间里党之私矣始予自山东来抚甘地方塘子实先我两年而至窃自慰曰博无似深惧辱天子之明命幸有方塘子在必能力救我殆瞽之有相焉尔矣丙午七月方塘子逆我於永昌之东余因咨所宜先方塘子曰河右孤悬不通丹楫脱有虫蝗旱涝之灾胡以相恤必也其屯田乎余乃讲求其故首疏以闻以故酒泉浩亶之间芜田开治不下数千百顷且耕且守庶几乎昔人湟中之遗绪焉既而请益方塘子曰飞輓之坏贾人之无利也贾人之无利法网之太密也因

其勢而利導之必也其恤賈乎余乃为之檢其犍平其冤厘其蠹賈始有來蘇之望尚有未盡者蓋七年之病固非三年之艾所能亟反也已而又問方塘子曰冗兵不除虽米粟如山弗能供也今疲癯老稚咸隸行伍者則甘峻古城巡邏之兵更番迭上勢如奕棋岁费行廩不下千鍾何濟於事余乃簡精勤之吏四出治之旬日間汰去数千百人且請於朝募兵当戍甘古分置防守官董之既有藩篱之固又无糜费之扰吏民不知方塘子经略之详妄意以功归我良可恶也已而又問方塘子曰河右险远先守后

战塢堠之斥墻塹之繕不可弗之讲也余乃檄下诸司各计厥功是故安远镇番议城高台平川议塹山永涼庄议堡西宁议峽其他修守之事日有议至应酬弗暇秋防在迩万一可庇我民劳何计焉於戏此其大较也凡方塘子之诏我千缕万端更仆未易数之方塘子参政陝藩计日行矣离群索居余当何赖哉窃以赠人以言之义敢为方塘子报夫朝廷张官置吏凡以为民也而刚柔宽猛类各不同所以示政也故周典有春官有秋官夫春阳也未尝无杀以生物为义秋阴也未尝无生以杀物为义要之天

道人事理一而已往代官箴姑未暇论今之司寇即古之秋官外之臬伯亦秋官也今之宗伯即古之春官外之藩伯亦春官也方塘子三岁河右风清气弊绝秋官之治亦既修矣今按部而来也方将首秦陇次泾邠次潼华徧历关辅问民疾苦而抚循之劳来之斯固春官之大方也侧闻天子锐意河湟尽括列郡之民往治边塹拓还祖宗之故疆甚盛举也至於经画调停使外宁而内弗扰是又诸大夫之责也经曰王命召虎来旬来宣无曰予小子召公是似方塘子念之哉念之哉会总戎咸宁侯仇公藩臬将佐

鳳臺縣志

卷之十五

藝文

十九

都阨请余序以饒方塘之行余遂不辭鄙俚執筆书之非不知諛修友道也

乾明寺碑文

裴 騫

泽城西北里为洞阳山又曰肫岳山俗呼为嶽神山上有先仙祠嶽神庙庙为洞阳观由洞阳而东为可寒山山之麓为乾明寺相传居民某种异穀豕食之逐之入洞洞有仙人等奕者以布偿之曰可驚大梁其售不啻百金也后梁王知为火浣布也大军物色之遍洞阳求弗得祇闻异乐飘然四空间兵驻可寒今山上有营帐遗址多甲叶箭

头者居民僧众尝得之其事荒唐莫考也寺属唐泽晋城县建兴乡砂城里刘绍等以为避兵之所二十年昼夜不离谿谷后获平湓愿答佛力天祐十四年开荒修筑号乾明寺山自肫岳而下蜿蜒迤邐盘据太行之巅北负龙泉南通圣乐控桃固之岩嶢引榼山之耸翠可寒一脉峙为五峰蟠龙踞虎维东有松维西有栝中有崇冈结聚团美山势围合顾视五龙争珠状佛殿西隅有池与堦圯平手可掬取予忆为儿时从外祖审理李翁游翁常谓曰乾明可寒山名也惜无记之者蹇因谨识焉

鳳臺縣志

卷之十五

藝文

二十

张侍郎昺赞

王世正

忠哉张公殉国以身稍昧几先委托非人密谋既泄大事以倾公平奚媿英谊千春鄙哉李吏乃兽乃禽

冀南道兵备副使王公平寇碑

张慎言

吾冀之南鄙赖国家福救宁无事户口蕃殖鸡犬之声相闻有康衢击壤之风盖二百六十年於兹矣往者关中震隣言窃有杞忧说者曰冀野既不腆不足以饱彼且析城濩泽之险为贼所忌无庸为虑言曰是不然天下有事豪杰蜂起如刘项之争山泽可用偷安不则草泽之弄定险

负嵎吾土忧方大耳无何贼王家印以万众渡汾水而南遂阑入其境时使君檄有司督吾民收拾盖藏无使乡间有升斗之遗令贼不得入即入而无获不终日且饥而去不啻再四百姓不听也壬申秋七月贼遂以十数万众绵亘百馀里压高都而西子女玉帛厌而去嗣且月一至焉沁之南暨邑东西贼建号树帜者不一而足或以万计或数千既揭竿胁从者且十五六至若上党汾水亦不啻几过於是圣主遣大将军率偏裨凡若而人更勅大中丞亲履行间少稽再以严旨切责边司马辍宣云来视其事又

再遣军容日夜督察罔少怠先是既不听使君檄且以饱贼而公私如洗贼十五六过兵尾其后者数如之壬申秋稍有穫初尚竭蹶供亿父老子弟更相劝勉曰此二百馀年才有今日尔敢爱其馀悉索敝赋以充壶浆不幸大军之后又以灾告贼氛既未衰减我师兴发未已瓶罄垒耻可奈何且大将军建旗鼓来者凡几易偏裨而下材官蹶张各率所部冀厌厥欲未易更仆数然缘辘发纵之机愚闇未知所属格格不相能而文武远近中外之间叩顙不灵军容奉简书赫然居其间吁难言之矣余至今日贼既

遁去得从父老后谓幸可旦夕无事矣痛定思痛始进父老而讯之曰往者芹池之捷贼已踰吾邑而西五六十里时偏将军领二千之众既越富店问谁督之令其啣枚而返杀千馀级贼遂鸟兽散乎龙泉之捷贼以数万据润城白巷恒舞酣歌曹将军出贼不意杀贼数千除堕崖堑而死暨所获妇女无算计先后大小之捷兹为首功贼胆裂於龙泉之战后不复饮马於沁阳问谁督趋大将军卷甲而趋夜发高都行百馀里贼惊从天而下也流寇祸始关中强半叛卒日者踰关逃伍啸聚铜鞮间效尤家印问谁

晓譬祸福以千金犒首从遂下马投戈感恩图报后皆得当以报究不至貽叛之害而反受抚之利乎冀之南守与巡各画地而治若农之有畔也谁能左右昼朝潞子而暮汾水拮据卒楮奔命永宁石楼间三交坪豪子原督率兵将大小数十战所杀掳过当不以代庖卸擔者乎郡县被兵者二十餘年矣纳履踵决正冠纓绝兹其时矣兵至之数与贼相当供亿之苦亦等焚掠问吾父老何以不怨年来芻饟无算丁抽亩税应命如响怀谁之恩感谁之义而令子来如兹也军容之役吾未之前闻也一切上下之文

率功令所不载往者豪杰之士且曰吾有拚此鸡肋尔今中外多故简书在上诸守令势不得强项曰吾视此冠组土苴也问淮调停其间曰吾赤子方在水火我为父母不救焚拯溺而区区为倔强之故自矜豪举乎忍辱以忠上揅民噫良工苦心矣将受命则忘其家援枹而鼓则忘其身兹且骄蹇无人礼至拥丝肉得所掠媚靚诸於绣黼以见兵使者又偏裨而下半以废闲从志在玉帛幸则猎其功罪无所归问谁驾驭之贪者骄者狙诈者究皆束於文法得奏尺寸之功而我率借其半臂也宣云非无事之地

也大中丞临全晋贼豕突狼奔东西无已时更风云之变将在呼吸年来仓卒机宜边司马御史大夫直指使者皆从容受成於谁氏之手军兴既无惟正守令从事卒不至襟时及羽书旁午牒诉倥偬率从稟谁成也客兵之害盖从古记之矣岂惟兵诸大小将领有事而至吾土皆客也年来往返之积殆不啻百万矣此百万之客谁为主人令去来无恙且令得奏肤功也不宁惟是辛未水峪之役贼以数千僭号九龙窟穴於兹盘据五百餘里匪朝伊夕矣有司匿不以报当事者即知之曰姑有待尔使此贼尚未

授首当紫金诸贼跳梁之秋东西响应上党高都皆此贼
驾轻就熟之地一犄之一角之踞太行之脊进战退守恐
今日尚未得朝食也谁为徙薪之谋毅然捣而穴不幸其
中伏芒额中创者至再三事几殆矣奋臂再呼渠魁授首
遂犁其庭献俘於阙曾未几时西贼见我遂得一意攻
守无东顾之忧也言未既诸父老长跪而告曰微大夫之
言吾侪小人其何知焉但后先毫髮率吾王使君之功我
父老子弟食此无疆之福然亦未知艰难至此余曰固也
使君何术而处此父老曰恐非权谋术数则终无济理余

曰否否一老人庞眉皓首年且九十餘扶杖而前曰军旅
之事何妨术数吾使君不专恃此也政是瞻识才智尔余
曰固也术数有时而穷恐才识亦未可专恃也三晋有事
三年於此不为不久其间民兵上下中外文武瑯弁之际
戛乎难以覩缕矣即御史大夫大将军且三易焉又其间
朝更夕易者不知凡几独使君几几於先后久近卒奏破
斧之歌此岂为苟且之政徼倖万一耶我默有以识其微
矣皆使君之诚也仁也权谋术数瞻识才智有诚则感之
至而仁则入之深耳然与否与诸父老又长跪面前曰尽

之矣是可以记吾使君矣请镌石以告来者可乎使君讳肇生山东掖县人以司农郎奉敕而来顷贼遁河以南秦楚骚然朝廷复简少司马陈公奇瑜节制诸省仍以使君监其军竹帛钟鼎之勋方新未艾也

泽太守宾吾王使君生祠记

张慎言

泽於古为高都踞太行之脊濒河以南河东墜温軹贾上党往来南北者泽实为绾毂焉固全晋以南一都会也所隶皆巖邑岁供赋徭二十餘万以故宦者称为信美羶图之然山险而风气劲悍民良者纤俭重稼穡猾者仰机利

博戏椎剽为奸郡中豪敢通吏胥桀点者持上下阴事又宗室日益滋骄怙奢从贫无四民之业率醵金聚党与择癡富鱼肉之至陵轹郡人士有司者莫敢问泽於上党就上党於汾阳不得檄泽李官行部泽与分庭焉弱者虽阿就之不则执前例甚力率不相能已辄中以他事往者士器於庠宗横於下邑上下断断如也贤者又辟为畏途不肯来曰王使君守福宁一岁以长者闻又吾乡诸荐绅先生习知使君及获从诸子大夫后一望颜色无不心降皆愿得使君已而果辍福宁来守吾泽至之日上下熙然为

真得父母人方谓泽故难治定当敢击行以严削刻急为理始奏治辨名乃使君独尚宽和禁网疎阔大指诸特去其太甚坦夷明白不特贤士大夫洞悉之贫乡下里皆晓然知使君心事当甫下车郡中豪大家心轻之及门内外奸猾日易与耳使君外宽内理不务胜此辈为名心识贤者式其庐馀亦若不知其为不肖者然明允笃诚廉静博大居久之见不可惑以非心折焉听讼时恣民所欲陈已则使君为说利害如乡三老聚鸡黍为居其间者惻隐之心可掬以示人民无良猾罔不愧服往邑隶州视府差低

昂又之郡伯虽称师帅诸布条教不过移文有司有司故事视之使君谨身率先严重无假借意所为均赋役清里甲省词讼革耗羨禁侈靡课农桑积仓庾绝餽遗恤邮递躬先始终推行之往徵赋急钱簿者斥不与星轺而北冠盖项背相望阳沁复崎岖万山间执轮蹄者产且立尽为力请当事者次其等加额各有差先是贾於郡者屋相比已而苦更亟辄废其居居他邑比使君来从上当温轶间争藏於是法何常之有按法绳之小者配大者诛使君既不纵奸宄然毫无失人如张自安甘馀人冤久滞疑则方

待讞比得白十二三庾死不则罄其产使君为曲寻其在
状爰书详恻周至令若等自对吏簿责不啻其口出速为
白得报而后已配以下减者复无算宗骄悍不可制大约
富者居奇乘诸庶宗之急率出钱物半始十得五预收春
若秋之券抵期持券之官府获白镪若索诸寄而贫者又
复贷如前时以故富者愈益横不特役使贫民诸贪宗所
与贯子钱者为若爪牙威重於守贵者亦避之唯贫无谨
检押散之多邑为暴无已时使君乃尽检诸所应给者一
日榜於衢有持旧券索积逋及非身赴者法无赦诸宗至

有无卓锥不举火者一朝得数百金以去是日懽声雷动
然有犯又辄以法绳之无怨色既人人自给而重扞罔强
有力者不得操奇赢诸宗亦以若无所关其缓急党尽解
势遂衰止不禁而自戢待以礼豢以恩犯则剪爪牙穷究
其视党使君夫岂无术而处於此然岂有声色哉然他人
效之或未能以使君坚直廉正诚信於诸宗士大夫也政
大略得其平耳大姓有不能恣得於小民者使君情法调
之迨后日二三大姓复求多於使君所案百姓遂一旦决
积忿至烦柱后惠文方知使君所全者大也使君守泽□

无赫赫之名其居官异无其居乡时曰吾奉职循理而□
以余观古循吏至千古脍炙然所称述不过务耕桑节□
殖财种树畜养而已至复录其琐细如曰种一树榆百本
糴五十本葱一畦菲家二牲彘五鸡此皆今日能吏所不
屑事史津津言之又刘祖荣为会稽当迁有五六老人庞
眉皓髮从若耶山谷间出曰明府下车以来犬不夜吠民
不见吏夫作守令者即不自言才然至使民不见夫亦复
何难之与有固当信百姓何尝奢求於官长令人人解推
乎至推酷吏被之以千载不可灑之名乃所摭拾则又公

廉不可交以私方略教导咸足称述始知古人艳称者今
嗤为俗吏今颂为能吏尚不足比古酷吏之百一悲夫使
君既不肯自表见人亦无有知者独是郡邑之君子及贫
苦耕凿之民思特甚今不过随牒需次而已则廉吏可为
而不可为诸贪者馀财以长子孙且嗤使君使君其何辞
焉昔子美叹元道州曰得结辈十数公落落参错天下为
邦伯万物吐气不肖於使君亦云郡若邑方尸祝使君子
以人所思而不能言及其所知而欲言者为道其实如此
使君名所用字行素号宾吾河南怀庆府河内县人中万

历庚戌进士记之日而使君乃为兵部车驾司员外郎

泽州大堂铭

冯 瑗

环境千里置府以治州亚於府建官次之有临乎上右□
乎下凡尔所职承流宣化蚩蚩者氓休戚在尔心诚求之
如保赤子无妨其穡乃衣乃食无殫其力乃休乃逸兴举
学教恭敬神祇狱讼必平赋税必时毋纵民厉毋侈货黷
维仁维清如冰如玉如绳之直如鑑之明岂弟君子懋永
令名万历二十八年立石

旱魃解

李维正

鳳臺縣志

卷之十五

艺文

二九

繁峙女怪或以为旱魃非也云汉之雅曰旱魃为虐传旱
神也笺旱气生魃而害益甚疏引神异经曰南方有人长
二三尺袒身而目在顶上走行如飞名曰魃所见之国赤
地千里一名旱母遇者得之投溷中即死旱灾消此言旱
神盖是鬼魅之物不必生於南方可以为南人所执获也
韦曜毛诗问曰旱魃传曰天旱鬼笺曰旱气生魃天有常
神人死为鬼不审旱气生魃奈何答曰魃鬼人形眼在顶
上天生此物则将旱天欲为灾何所不生而云有常神□
艺文类聚引神异经语又云一名貉检韵书说文曰旱魃

也周礼有赤魃氏或作媿文字指归云女媿秃无髮所□
之处天不雨周礼赤魃一作反按此则旱魃神鬼之属不
产於人今女乃人产不合也魃目必在顶俗谓天恐雨下
伤其目故旱今日不在顶不合也马端临文献通考齐后
王时死魃面顶各二目列之人疴中正以其非魃有二目
在面耳魃已异矣似魃非魃异之异者也前汉书五行志
皇之不极是谓不建厥咎眊厥罚恒阴时则有下人代上
之疴后汉书五行志同而引雒阳上西门外女子生男两
头异肩共胸又引刘仓妻生男两头共身以前一事为董

鳳臺縣志

卷之十五

艺文

三十

卓之应魃主旱而两汉志主恒阴其不合愈较然矣前汉
书传又言凡草木之类谓之妖妖有天胎言尚微虫豸之
类谓之孽孽则牙孽矣及六畜谓之蹠言其著也及人谓
之痾痾病貌言寢深也故此女怪谓之人痾其灾异在山

东牛怪上

今泽州每以生儿不全之母为魃母聚众用水淋浇致伤生命此文正足药俗

碧落寺西阁记

张宗明

碧落寺新阁成释富释来尝丐文於先大夫属后先大夫
遘疾不讳遂不果今来复要予记按寺乃司马山西一支
山也山行一直迤南而五断之故名为五门山极南尽接

晋普山而此则第一山门也寺坐连氏村下西北有水□
山经寺南流门稍东双桥其上上桥下路入寺桥房数楹
为南殿之複道桥北稍东为旧阁阁对松栝几万株苍翠
铺於殿之后为东西阁之望此寺之奇观处也阁旧为殿
殿旧即石龕龕前石壁直立数仞磨崖碑刻其上火燬今
不复存文亦鲜传吾家仅储楮本耳惜哉龕左右石如镜
存篆隶行草字十数种书咸如法此寺之奇绝处也因西
阁故呼斯阁为旧阁其实斯阁亦新阁也阁咫尺对溪堂
五楹入山门东二十餘步中並为山堂簷前壁嵌许刺史

文简公碑中上依山麓石间两阁为水陆殿殿楹门棖咸
石上刻唐宋人题迹瀟灑遒劲可爱文士慎宝重之新阁
则正当山门去溪堂稍远並峙於旧阁之右旧基为十王
殿殿亦遭回祿鼎新而重高之为阁上像文殊下则如旧
像焉巍峨耸出两山之中为入寺首观也经始於正德壬
申终始计之二十餘年乃得羨免焉富佛子亦可谓勤心
力於教者矣使为人臣人子肯操二十年不倦之心以成
君父厥事固不韪於是邪寥寥未之有闻吾甚有感於是
焉故记之阁殿翼煖金碧辉煌勿论一水涧於两山诸□

峙於南北山之峻絕處此寺之形勝真可愛者月夜管笙
與楹鼓齊鳴常也風天松濤與鐸韻並奏時幽禽弄噪或
怪獸驚啼騷人墨客達官貴游與夫閑士客子寓留其中
真可驅塵凡而豁俗慮不自覺其心爽快焉幽雅中有活
潑景趣方外者有或不知也予嘗謂即空見色求色於
空蓋不復知色邪空耶空耶色耶併付富來刻石姑為新
閣之記

澤州重建厅事記

商 輅

州郡厅事实牧守承流宣化之所郡吏於此稟度众庶於

鳳臺縣志

卷之十五

藝文

三二

此趨令爭訟於此求平趨役於此取均仁政由此出仁澤
由此而施者也非高广无以示公非虛敞无以示明非庭
阶森严无以辨等非門扉軒豁无以达情此而弗治如治
人何是以有志之士必先整飭厅事以为正己正人之本
非徒侈观美而已泽州本禹贡冀州之域尧时甸服之地
春秋属晋战国属韩秦属上党汉始置高都县隋改泽州
取濩泽义唐宋因之元时领晋城等五县隶平阳路国朝
省晋城领高平陵川阳城沁水四县直隶山西布政司州
有厅事前代莫考再建於至正五年而重修於洪武二年

至是岁月浸久风雨震凌梁柱朽腐左枝右撑日俱覆□
知州陈奎涖事之暇谋诸同知赵凤判官王用等搏公费
佐以已俸鳩工市材撤而新之重建正厅五间鼓楼五间
仪门三间东西吏房各十五间经始於成化辛卯春正月
阅三月毕工落成之日皆称叹谓是役也材力弗劳於民
而规制有加於昔誠宜文诸珉石以示永久於是知州述
修建始末走书介户部侍郎原公杰檄余以记夫厅事有
關於政令者也今兹轮奐既吏民方改观易听州之长貳
将何以慰群情之望哉亦惟端本澄源使发於己者皆大

公至正之道施於民者无暴政横斂之失夫然后治化兴
行而厅事不为徒建也已知州由进士初任沁水尹有能
声用荐迁今职清慎疏通州人感悦将来未可量云

贈傅東渤郡侯考績承恩序

周 盤

傅使君滿三載考文无害自監司達中丞御史台暨考功
曹咸課聚書上上疏請封太尊人如其官制曰可邑長高
平劉君陽城王君陵川沁水張君夙受使君約謂余習使
君治行久走使徵余言賀焉余遜謝不敏蓋使君之干旄
來自郵城濮水之間也吾郡无不人人自喜者曰與其新

发硎之以吾郡为锦其以学制也如已试焉而效而代为
历之濮受祉者乎濮当汉时河决瓠子至烦天子之璧马
仅亦塞无状此非濮上已事耶尔者河失故道治河使者
切责濒河诸长吏乃使君实绾濮上之组代为政濮才得
什一理之耳什一理之而歌孔迩又不至閭殫为河则大
冢宰计所为什九理之而不足者以吾泽烦使君也泽故
所谓山诸侯之国也自太行之险以至境内若甌脱然宗
齿仰食县官口益繁更率诸豪少年暴横里中不翅御人
於货有司者莫敢问即问而不可一切从事乃使君大指

布宽大罢诸所为不便民者其难以文法吏事泄者以方
略临飭之曰齐民响其利者为有德不则有三尺在唯是
二三恶少之首事也武断暴豪彼既有挟以为重使俛而
与齐民伍其谁降以相从有司者实阙焉不闲於方略使
若不获与於宽政也事在得平耳以民治民以士治士以
宗待宗若即少子政辈詎无如乡党自好者岂情也哉广
宁滋濩守以上无所为受成令所不能决者举而移之守
守以所自为及代为令者又转而属之使君乃使君犹若
是什一理之而罔不为便宣调停也上下无不若臂指民

无不若毛属里离则吾泽岂不代为历山之濮受祉者乎使君之居东也东人曰无以我公归兮比楚有材而晋用之也吾郡又曰彼美人兮西方之人兮濮人其胡得私焉使君胡以随试辄效所至诵义无穷若是泽则曰代为濮受祉耳濮人缓须臾以观德化之成时使君初释褐年才弱冠胡以事如成局若庖丁之奏刀盖王君刘君又於公为年友尝言之矣先是辛丑春使君以妙龄跻巍科使君以彼其才眎读中秘书犹掇之也乃使君殊不欲急试其奇太公亦趣使君归益恂恂为乡里之容上下千古计所

为以经术饬吏治者何在无令异日有不合者烦仰而思之暇则从里中父老子弟游问所为愉苦长吏状业已平揖龚黄而梦寐乎颍川渤海矣岁甲辰始射对南宫遂卓然以五马出此吴公治行用称天下第一也语曰退藏於密吉凶与民同患彼其行春历山箕濮之上也与九峻澧水也奚以异再历於太行丹沁也与历山箕濮也又奚以异素履而往耳为鑿者三齐而不敢怀爵赏诽誉忘形骸肢体也然后见见鑿然后加手焉郡之为鑿也大矣其复以三年退藏也不啻齐以七日矣一日剖符夷然而

出之岂忧不效哉不佞因是见公锡类之孝缘知太公□
趋使君归也今日亦不为鹵莽之报矣羔羊之皮素丝五
絰缙衣之宜兮敝予又改为兮猗与休哉

参魏忠贤劄子

瞿学程

奏为权奸之罪恶既盈老成之忠諫宜录伏乞圣明大奋
乾刚亟赐重处以快輿情以培国祚事臣闻临朝愿治皆
求忠自为举贤自辅乃忠而未必忠贤而未必贤卒令怙
侈灭德天怒人弃其害蔓延而难於救药何哉则以真忠
真贤者其心朴其人多苦劲而拂意伪忠伪贤者其心险

鳳臺縣志

卷之十五

艺文

三六

其人多狡诈而顺旨积拂则生憎积顺则生爱此亲疏之
所以分而治乱之所以相寻而不可挽也臣见我皇上临
御以来未明求衣日昃亡倦批答如流嗜学若渴可谓尧
舜主矣尧舜之世不乏四凶岂谓今日而无若人哉所贵
乎天聪明之尽者在灼见而速屏之耳书曰朕暨谗说殄
行震惊朕师又曰能哲而惠何忧乎驩兜何畏乎巧言令
色孔壬君臣之间吁谟戒飭则圣哲之虑远矣日者臣堂
官左副都御史杨涟疏参大珰魏忠贤胪列其罪状纒纒
数千言射高墉之隼问当道之豺义泣鬼神忠贯金石遇

都吐舌相顾且手额交庆谓奸邪从此可逐朝廷从此可
清海宇从此可安其关宗社生灵之计者甚鉅自漣之疏
出而诸臣或公疏或单疏发愤吐懣攻击不遗餘力臣於
其间何容再置一喙顾当此时我皇上宜急采箴诵之言
以补不逮赫然震怒寘忠贤於理而濡沫卵翼尚未损其
一毛大奸之去如孱拔山诳言之入似水沃石臣始惶汗
大恐而不容默默矣夫今何时哉雨泽愆期兵车互驾男
子疾耕不足充口女人勤纺不足盖形正皇上焦心毁颜
宵旰图治之日尚可令贼或在内虎或在傍怨讟盈路容

容而不为之所乎人亦有言一髮引千鈞盖其重也大阨
竖如忠贤去之不过一孤雏腐鼠耳果安所關於治理而
为大利大害若是则以从来小人之祸国家者其始犹有
所顾忌而不敢恣既经指摘自知不为君子所容甑已破
矣顾之何益遂甘心於大恶而不之恤举前曰弥缝变幻
之计尽肆为猖狂无忌惮之行故种树畜养不见其益有
时而大弃义背理不见其恶有时而亡也则履霜坚冰易
训切矣且皇上亦知忠贤一段狰狞之态乎书曰惟辟作
威惟辟作福而老子曰鱼不可脱於渊国之利器不可以

藉人忠贤手握王爵口含天宪少拂其情能立致人死□
所谓作威作福而授之以柄者非与柄之所归众之所□
蚁集蝇聚将群起而辐辏之纵横颠倒网不如意是祸患
生於肘腋而左右之间有戈矛也岂不殆哉今国家外忧
未宁内患又起然外忧不过边事选将练兵可幸无恐内
患则上下相蒙表里煽惑故堂上远於百里堂下远於千
里门廷远於万里何则步者一日百里之情通矣堂上有
事十日而君不闻此所谓远於百里也步者十日千里之
情通矣堂下有事一月而君不闻此所谓远於千里也步

者百日万里之情通矣门廷有事期年而君不闻此所谓
远於万里也甚哉忠贤之为壅蔽者大也决其壅而撤其
蔽则皇上之明並日月矣臣闻叔向曰大臣重禄不极諫
小臣畏罪不敢言下情不上通此患之大者璉大臣也与
公忠正直之左光斗等亲受先皇之顾命拥戴我皇上於
日月之际亦功臣也锄奸剔蠹正是尽職易危就安正是
酬恩而曰寻端沽直夫諫诤之事触忌以神词蒙死而竭
智当人意气所激无不欲犯颜苦口为主上一言而迴思
却虑其闭喙而休投牒而废者多矣自非忠尽天植谁肯

批鱗履尾轻以其身试於不测之渊哉昔王曾正色危言使宦官不敢窥觐而君德日就臣於涟等有厚望焉谚曰千人所指无病自死盖言众怒之难犯也今举朝以为不可通国以为不可即传诸普天下谅亦以为不可者而皇上肯独以为可乎水火不言而冷热之质自明者以其有此实也忠贤有其实矣故众口沸腾如矢之集的怨气满腹似蜂之攒身人非鬼责合併交加清夜内省能一帖席否忠耶不忠耶贤耶不贤耶亦大拂皇上命名之初心矣夫亲贤纳谏从善如流此理道之所以日隆也拒谏饰非

狎近匪人此王业之所以日頹也顾其要只在乎能断语曰镞邪非利无异铅刀又曰当断弗断反受其乱惟我皇上大奋乾纲早赐圣断将魏忠贤速加罢斥明正其罪以泄神人之忿庶衅隙不生祸患不作而亿万年有道之长端在是矣

太行虎记

徐芳

太行天井关之西十里有草庵焉老僧居之尝闻行山涧中有小虎子才大如犬折前一足委顿伏地殆崖石损堕而为虎母所掷者也僧意怜之携归庵饲以粥钵虎饥得

钵辄饱食后遂驯习僧出则尾随居则膝侍婉昵柔狎不去左右居二载虎益壮猛而驯如故一足微蹙人呼为跛足虎客有过庵中者虎亦迴旋妥适略无疑碍於是远近高僧之行谓能伏虎僧亦栩栩然以为虎与我善也一日僧攜虎远出至天井关鼻衄血不止淋漓注地僧惜其污以足点地使舐之虎得血甘甚嗟其无几又馋不可忍遂前扑僧负而去之响中餐啗殆尽自是此虎日蹲伏要路间伺行人过搏噬不复食他物以其初入喉时甘在人也而凡他虎之出没太行者亦皆一意啗人往来行旅伤害

甚众每日斜即相戒裹足今十数年矣而患未息论者以为皆跛足虎煽导之云事在崇正末岁论曰语有之非我族类其心必异虎噬人之兽也而养以自随又教之舐血启其馋狼不但碎身而流毒於当路甚矣僧之愚以小不忍贻大祸也虎赖僧之力免於困死又抚摩煦育经历岁月一旦又眼见血而不见人斯其所以为毒兽也往读中山狼传哑然笑之以为形似之言不意竟有其人乃尔虽然僧其小者也汉之新莽梁之侯景唐之安禄山辈皆厚宠隆恩长其爪牙丰其躯力及情迁意改变起仓猝至於

不可控遏向之抚摩煦育皆足以为储凶酿螫之资而已
天下跛足之虎多矣何独太行也屏而远之寘之深山大
泽间谨吾藩以自固虽有毒亦安能及彼庵僧者贪驯虎
之名而自以为虎与我善者也

祭南山神文

邹守愚

嘉靖三十五年二月二十九日户部侍郎邹守愚率兵备
副使汪来都指挥王玉致祭於南山之神海渎之神曰天
子明圣道在位天地而抚神人宵旰忧勤期臻盛化迺者
地震之异出於非常圣心惻焉惧神之不安於居也不以

鳳臺縣志

卷之十五

藝文

四一

余为不肖亟遣以告於神适然之变毋亦出於数而不可
逃者邪神其毋或震惊又知神之显灵於兹土以余为善
虔请於神冀锡之鑑和阴阳兴云雨蕃百物登五穀以康
乂我人民则固神之能也神其毋或靳惜

重修濇楼记

宋甫

夫濇楼者所以宣天道示人时泽之濇楼在治前距创已
远重修於国初知州事湖襄李公祥岁月浸久群材腐漫
先是成化初汲郡陈公奎虑其倾压撤而欲新之未几公
陞去任材积一空厥后继理者皆弗遑及至庚子岁扶风

张公文质迺始踵旧趾小北而台之餘材未偃绪会今侯
陆公伟入代欲谋成终寻值岁歉还止而台左右渐剥落
观者日望成焉宏治改元岁稔民安公知人心所在於是
计度鳩工庀徒执役始於儒学明伦堂次明道夫子祠最
后迺及此楼台基仍故完敞从今构楼於其上高四寻有
奇广五间巍然焕然法度俱举制作视昔殆相倍蓰经始
是年冬十月竣事於明年春三月夫天道之运度民故之
动息所关作者知其然故因物制器而又崇之以楼使曰
壺曰鼓曰筹各得其所而昼有示夜有惊阴极子阳极午

向曙入暮凡晨舍所主罔不瞭然分明非惟民之勤倦作
息内外百为准於此大至官府之政学校之教军伍之操
歇细及行旅往来成逻之巡惊兴止亦皆以节樵楼所以
宣天示人如此此古人所繇作也公能於兹复之也而其
功化亦岂有穷焉以故未作也而仰其成已成也而乐其
事是虽劳且费不以为厉况不劳不费乎於戏此公之作
所以为贤也詎可没其善而不为之书耶公名伟字仲奇
世为杭州钱塘人成化乙酉乡进士明宏治三年庚戌秋
九月十八日立石

訓導鄭可权建譙樓記略曰澤州界怀潞之間当南北冲据太行挟丹沁实为奥区今载罹兵荒民稍安集洪武戊申李公祥来守是邦於公廨之阳地形塽塹俯临城郭建譙樓横七十尺周二十丈高起四之一架屋三重鸾翔虹亘於以宣钟鼓之声定旦暮之节斋七政之运行惊庶民之动息岂徒侈观羨快登临哉

迁烈妇郎氏祠文

傅淑训

呜呼郎氏曷为乎祠以表节也然则曷为乎迁说者以为为厉也余曰不然夫郎之为节昭昭也节於天地为精灵

於山川为闲值岁寒之柏松狂澜之砥柱物亦有之人亦宜然若夫伯有之死化而为厉伊川谓别有一般道理其说近诞不可信即有之亦小人之尤者耳夫正气之与戾气若阴阳寒暑晦明昼夜之不并行也又若水火冰炭然相为胜而不相为用如郎氏毅然死节殉夫九原岂非浩然之气塞两间而独存者乎则其谓之非厉也亦宜说者又曰南为离方厥帝祝融厥象文明厥德火今肖妇人女子像於门祠之不类亟撤无需余又曰不然凡所谓丈夫者其直谓其峨然而冠修然而髯魁然而貌褒衣而博带

禹行而舜步者之为丈夫耶其亦谓不待生而存不待死而亡宁百鍊刚毋绕指柔者之为丈夫耶之二者固有辨也如郎视死如归百折不回岂不女中丈夫哉曩令郎为子必死孝为臣必死忠即龙逢比干申生伯奇复生何多让焉又令覲焉具须眉以号於人曰丈夫而为利疚为威惕以播间为淇上以媚皂为倚门又何以易此吾未见剧秦美新之非巾幗也未见犬吠丛薄之非柔中也又未见六郎之面非莲花而钦明八风舞之非长袖也则虽谓郎氏之非妇人女子也亦宜然则曷为乎迂曰坤德主静也

妇教主贞也方郎之有夫也夜行必秉烛送迎不出门见兄弟不踰闕其天性也及郎之未有夫而称未亡人也闔门自守形影相弔一切屏绝户外事诸为侯也族鄙者及为郎也父母昆弟者谋一面难於俟河之清苟得正而毙焉而其志固已毕矣南门何地乎其纷华则五都之市所绾毂而百货之所辐辏也其杂遝则贱丈夫之所为垄断而神农氏之所不能治於日中者也若乃庄妹艳蛾飘衣轻裾村姬里媪抱布贸丝间左少年王孙贵游之属鲜衣怒马黏竿蹴鞠樗蒲为乐特过其祠而登若堂当斯时也

知必有愀然如蹙其容而輾然若不能以自安者矣何者其靜之不可以入器也其貞之不可以侪俗也理有固然无足怪者门以外有地一区爽塏而燥洁窈而深廓其有容繚而曲无諠无杂将肖郎之像而祠焉吾知郎之必有当矣不可知者以为为厉也其知者以为为妇人女子也皆非也於是刺史傅子鳩工庀财量地度日将率二三僚友以共成此举也先酌之酒而誄之以辞

中村庙兵荒碑记

王梦震

崇正四年流寇作乱其首曰王加印者自秦入晋统领五

百餘賊夏六月來中村居民盡被搶掠然其時受害猶小其首号曰紫金梁各党与复自相名目次年秋大营賊过有老獬獬八金剛八大王扫地王闯王闯将闯塌天破甲锥邢红狼乱世王混天王显道神乡里人活地草等大约三十六头目分营三十六哨賊众约百万有奇经过七日所在焚烧劫杀抢夺财物擄掠男女其餘骡马牛羊鸡犬罄尽靡遗哀哉难民遭此凶毒间有逃匿山隅或深藏窯□者賊率其党搜山薰穴死於賊变者又不可胜计逮六年八月十一日遂破我县城城内外父老子弟受其屠戮

骨肉分离惊散实难言状厥后贼众去河南馀党土贼尚群聚数千人盘据兹土凡五载境内人民尽逃奔他方城池故土竟为贼垒战场矣十年贼方招安里民稍稍复业则岁歉薄收十一年蝗蝻食我田苗民复困於食明年幸黍麦告丰又明年闰五月自夏徂秋赤地千里岁复大饥间阎惟藉草根木屑为饼啖甚至无所得食则杀人以食往往父食其子夫食其妇亲属相残苟延旦夕真令人目不忍视耳不忍闻屈指兵荒以来所在丧亡户口十去其九矣十四年春斗米两银斗麦千钱油一斤值钱三百豆

一升八十钱至於柿枣、羌桃每个钱二文客至则不能供酒肉凡猪肉钱二百五十文羊肉百二十文牛肉钱一百文有一鸡而得千钱者有一犬而索两银者猪一口则一二十金不等食物之贵一至於此尺布值钱七十棉花一觔值钱五百故兵乱年荒不惟食不充饥布衣温煖亦不可得大兵之后必有凶年似此哀惨情形使人瞻丧心裂爰刻石为记其事如此崇正十五年四月八日邑庠生王梦震记

今上改元之四年岁在辛未王公移辽州守守泽四载以同转运迁秩去兹且泣河南郡太守晋副宪矣公之劳勩久而弥显泽人之思公久而弥笃迺创祠□一以为公祈福一以为泽人之不忘公也忆辛未壬申寇来予读书已从诸绅士后日与公从事城头具知公初尹武乡尹翼城守辽州三转皆晋地所至有声而公泊如也治泽一如治三郡邑而四载拮据十七御寇则所遇之难百倍於治三郡邑不遇盘根错节无以别利器岂造物投艰以益公欤将泽有天幸以公活我百姓欤以余耳目所覩记泽人士

鳳臺縣志

卷之十五

藝文

四七

所信服其推心接物是公之醇德也案无留牒是公之敏捷也金矢无扰是公之廉洁也顰笑不私是公之沉密也狐鼠缩项是公之威肃也出纳惟平是公之正惠也然余所为公称难为泽人称庆为属邑之邱垄族里庐舍荷保全者尤在御寇一事流寇自秦渡河阑入晋地连陷多邑杀人盈野泽故无兵即卫署亦仅存空籍抚标鞭短监司张空券应援二三弁营尾贼而不见贼见不杀贼援兵绝望独剩孤城大镇累屠万家之皂无烟火公躬率宗绅士□□营城守规画洋明举夫搜奸宄恤庶士慎刁斗严侦

探诸事确有胜画如招集健儿则登陴有人设四乡练营
则郊圻有备创新营千兵则追贼战胜此其大凡也积劳
而病病亦不归州署仍支牀城上部署惟勤亦太苦公矣
既而贼去兵来中贵总戎接踵以至索饷徵芟坐食城市
其视州牧以下如厮养公妙有窾会能使为战守之用不
令怒亦不令喜事以济而军以行虽所费不訾宗绅士庶
捐输於常赋之外而公补其所不给卒以无譁於今桑田
如昔雉堞依然伊谁之力乎上功曰最主爵迁使佐转运
可以慰劳臣之气哉公今逐寇河南一用其所未足较方

州之事权威望岂止倍蓰登高而呼则应之者疾也功成
必有以报公矣事有不可不忘者有不可忘者臣之有功
於国惟恐其不忘也易云王臣蹇蹇公故不敢言劳竟忘
人之有德於我惟恐其忘也诗云勿翦勿拜则此畏垒之
垣墉不改为我春为我秋者又岂可忘乎余从泽人之请
述所睹记信服之略如此王公讳孕长北直吴桥县人

留春亭赋

张明弼

青山易驰白日不飞人间春尽东皇未归若乃濩泽湖边
太行山上峦高气深林迴岚亚夸蛾负之而趋愚公面之

而舍沁园之謹鳥猶存秦坂之愁虫已化爰乃聚烟为居
招云 宅草依石以作丛池带亭以布籍葺风霞之新庄
置卉鳥之旧驿变时会之千声引鲜霞之百色当夫紫陌
穉生青塘激起绣地瑶花连天发蕊风款款而香条云油
油而媚水丝谁织而网空絮谁抨而煖路雁怀乡而芦抽
薪成家而芹努则有碧兰动寃朱棠挂想花入梦而癡生
草护门而傲长坐烟坛而骨虚临霞道而神怅愿螺笻之
常盈愿鸳帷之恒敞愿锁莺於艳郊愿恣骏於荣华何处
春多何门春少谁请春迟谁欢春蚤叶萋萋而短长萼纷

纷而大小红气盛而天酣绿光浓而野縹云似学乎游童
人亦同乎戏鳥一旦飞英会散踏春歌残厚尘版荡丹雾
瓊珊青君之组将解朱灵之鞅欲还牡丹如过眼之容杜
若有成人之颜野蜂税佛於花户鷓鴣梦觉於枝关送春
兮如送情人别春兮如别故山此独芳有餘辰花无断事
阴壑乍凄阳崖旋媚未解青跗先舒丹穗凉未暄初年归
岁至恍卫哀而霍盛似赵升而班弃寄餘粉於蝶须宵宿
殷於燕翅认青帝於鳥谣印勾芒於苔字季遗石上之寃
雨醒山中之醉条风歇兮薰风来陆红坠兮水红开露之

晨兮筭綠方稚霜之月兮梅白已孩烟朝朝而籠沼月夜
夜而依台几簇好花不放眼几丛香草不縈怀几树鸟声
不散履几林月色不飞杯谁识阳和尽阳和正未迴况乃
地是兰亭人原姑射道總巢夔韵兼陶谢挥毫罢而号颠
著书成而名化身虽昵於金庐神自纏於碧榭牛解万有
鸟栖一官炳兰心而桂魄渺筠肺而松肝串宾云而旅月
习窳俗而殛唵裁珠树为一林散琪葩为两队集繁蕤以
作衣缀杂华以当盖禅欲参而栢吟诗未成而鹤怪二十
四番之信风三万六千之色界肯许苍精上病书詎令炎

主为交代乱曰春无期限兮被君留君独留春兮我遂偏
秋愿放春於寒谷兮偶春光与我而相求

